

Reforestacion na Aruba:

Plan pa planta 100.000 mata rond Aruba

Diahuebs atardi, a lansa e plan ambicioso y sin precedente pa planta 100.000 mata rond di nos isla, durante un ceremonia special di apertura pa e Programa di Reforestacion di Aruba. E evento a trece 27 organisacion no-gubernamental (NGO's) cu a uni na e mesun meta: restaura nos habitat natural, yuda proteha nos hendenan contra e calor, y crea mas sombra tur rond di Aruba.

Durante e ceremonia, Francielle Laclé, un lider hoben y consehero di politica ambiental pa Ministerio di Naturalesa, a enfatisa cu den cuater aña, kier logra planta cien mil mata. Esaki por logra si tur hende traha hunto. Mes- ter di cooperacion y compromiso di tur sector pa logra un Aruba mas berde.

E proyecto ta un esfuerzo colectivo entre organisacionnan



ambiental, scolnan, sector priva, turismo, comercio y mucha mas. Den e prome sesion cu stakeholders, a establece e siguiente paso: formacion di un "stuurgroep" cu lo guia e proceso, y tambe un klankbord pa duna espacio na mas organisacion pa duna input, comparti idea y forma parti di e proyecto.

Un di e companianan principal for di inicio di e plan ambicioso aki ta Grupo Benu, y den nan nomber, Joannette Vrutaal, HR Manager di Benu, a hiba palabra y a gradici famia Ibrahim, cu a pesar di ta den exterior, a bay

di acuerdo di biaha pa sostene y forma parti di e momento historico. Total Grupo Benu a planta 65 mata riba e rotonde adopta, contribuyendo pa yega mas cerca di e meta di cien mil.

Sra. Vrutaal a subraya cu "aunke e rotonde ta chikito, e ta un simbolo – manera nos himno: chikito y simpel, pero respeta y gusta pa tur hende".

Sra. Vrutaal a gradici Gobierno di Aruba, pa acepta e propuesta y facilita e proyecto. Ademas a gradici Fantastic Garden pa su cooperacion y pa haci posible e plantacion cu por aprecia awe. Aunke e rotonde no ta completamente cla, Sra. Vrutaal a sigura cu esaki lo bira un di e rotondenan di mas bunita riba Aruba. E Programa di Reforestacion ta mas cu solamente planta mata – ta un movimiento pa un Aruba mas fresco, mas verde y mas unido.



Un biaha mas: Ki ora 'na' y ki ora 'den'?

Den e edicion aki di nos exploracion semanal den historia y presente di nos idioma nacional, atencion pa algun uso menos corecto o menos comun, segun nos parecer, den loke nos ta mira publica. Den e caso aki, algun uso menos corecto, segun nos opinion, di por ehemplo 'den' o 'na' den cierto contexto, unda ta importante mantene e diferencia clave cu por existi. Por cierto nos a toca e tema aki na 2024, den e edicion di 14 di juni, cu manera tur edicion ta disponible riba internet. Nos no ta bay ripiti henter e edicion ey, pero lo elabora aki tambe encuan to origen di 'na' cu nos a hereda di Portugues y cu tin e mesun funcion cu e 'den', di origen Spano/Portugues: en/em. 'Na' ta e combinacion na Portugues di 'em' (Spano: 'en') y 'a' (Spano: 'la'). y tin su variante masculino tambe: 'no' (pronuncia: 'nu'). Pa algun motibo nos antepasadonan a scoge e forma femenino so, cu ta di acuerdo cu e regla cu nos idioma, salvo cierto excepcion, no conoce e distincion di genero consecuente den henter su estructura. En todo caso, nos tin un excepcion aki cu ta confirma e regla y nos no conoce e 'no' masculino Portugues.

Uso di 'den' y 'na' corectamente den hopi caso ta necesario, pasobra cada un por tin su uso diferente. Tin biaha por usa cualkier di nan, pero hopi biaha nan ta referi na situacion diferente. Ehemplo: "Mi ta 'na' cas." ta significa algo diferente cu: "Mi ta 'den' cas." Den e promer caso e 'na' ta referi na e lugar unda bo ta biba, sin bisa exactamente unda den e propiedad bo ta. E di dos ehemplo si ta clarifica unda bo ta: paden. Den hopi caso esey ta e diferencia entre 'na' y 'den', unda 'den' ta mas specifico cu 'na' den indica loke kier bisa. Nos ta topa regularmente tambe e diferencia entre 'na' y 'den' ora ta trata di tempo, especificamente por ehemplo un aña. Aki e asunto ta bira bastante 'tricky' pasobra tin ora por usa cualkier di nan dos, pero na otro momento

no. Ki ora anto bo ta bisa 'na un aña' y ki ora ta usa 'den un aña'? Nos ta ripara cu e no ta un asunto bon cla pa tur hende, mientras hopi ta kere cu bo por usa cualkier di nan, segun preferencia. Esey no ta asina, den hopi caso tin un uso determina, pero cu no ta conoci na tur hende. Ora ta usa 'den un aña' ta pasobra kier enfatisa cu ta trata di algo explicitamente den (tro di) e periodo ey. Ta usa 'na un aña' ora ta trata di indica e aña specifico, mencionando esaki den cifra. Ora ta referi na un aña specifico en general, ta usa 'na'; ehemplo: "Na aña 2014 tabatin mas accidente di trafico cu e aña anterior." Si bo bisa: "Den aña 2014 tabatin...", etc", bon conocedor di Papiamento lo keda mira bo straño, pero probablemente no lo coregi bo. El a comprende kico bo kier a bisa. Pero, tin otro caso unda uso di 'den' na lugar di 'na' ta haci gran diferencia. Laga nos purba clarifica esaki cu un ehemplo: "Den un aña di tempo a resolve e problema." Den e caso aki nunca lo por usa 'na'. Pasobra "Na un aña di tempo a resolve e problema," lo causa confusion pasobra e por ta referi na e situacion unda te despues di un aña a resolve tal problema y no dentro di e aña mes, manera nos promer ehemplo ta indica. Pa clarifica un poco mas, nos por imagina un persona bisando: "Te na un aña a (bin) resolve e problema." Esaki ta practicamente lo contrario di e promer ehemplo ("Den (tro) di un aña a resolve e problema").

Otro ehemplo: "Na ki aña bo a nace?" Aki no ta usual pa usa 'den' aunke nos sa tende hende usa esey, pero e ta keda zona straño. Tambe den e caso aki: "Na aña 2020 Covid-19 a asalta mundo henter." Aki tambe tur hende lo comprende kico bo kier bisa, si bo usa: "Den aña 2020 Covid-19 a asalta mundo henter." Pero e no ta e forma usual pa e contexto aki. "Den e aña aki nos lo cumpli cu tur nos metanan." Aki e mester ta 'den' y no 'na' unda e 'den' ta muestra mas enfaticamente riba e periodo ey. Si nos no a logra clarifica lo suficiente, por fabor laga nos sa via nos pagina di Facebook.

Ainda CAO di empleadonan di Arubus no a keda cla

Diaranson, Minister di Husticia, mr. drs. Arthur Dowers, a tene un reunion constructivo cu representante di SEPPA, Sra. Magaly Brito y Sr. Edmundo Marlin, hunto cu shopstewards di ARUBUS y Departamento di Inmigracion.

Durante e reunion, a trata varios tema relaciona cu bienestar laboral di empleado na e dos entidadnan mencio-



na. Un di e temanan principal tabata e contrato colectivo (CAO) cu a vence pa empleadonan di ARUBUS, cu ainda no a keda cla. Tabata ex minister di Transporte, Ursell Arends (Raiz) cu a haci e compromiso pa un suma

di 500 mil florin adicional pa ARUBUS, cual e minister nunca a cumpli cune.

Ademas, a trata e maneho general den Departamento di Inmigracion cual preocupacion ta biba entre e empleadonan. Minister Dowers a expresa su comprension pa e preocupacionnan presenta y a sigura SEPPA cu lo haci su maximo esfuerzo pa yuda yega na solucionnan practico y duradero.



Administratie di Units,
Stafafdeling y OLC ta atende
publico di 8 am – 1 pm.

Lo ta cera riba e siguiente fecha:

- Unit C&T: 25 juli t/m 15 augustus
- Unit S&S: 28 juli t/m 11 augustus
- Unit ECO: 28 juli t/m 11 augustus
- Unit H&T: 28 juli t/m 11 augustus
- HR: 4 t/m 8 augustus
- Directie Secretaressse: 21 juli t/m 1 aug

Finansas y OLC lo **keda habri** den
vakantie